

PASIUNA

Ang mga pagtulon-an sa DALAN SA KINABUHI gihan-ay aron sa paghatag kanimo ug madasigong pagsusi sa tibuok Bibliya ug sa samang higayon, aron paghimo sa tin-aw nga kalainan nga kinahanglanon aron masabtan ang Pulong sa Dios. Pagtisok diha sa imong hunahuna sa mga mahinungdanong butang, kinahanglan nga tun-an nimo ang mga bersikulo sa Bibliya nga imong makita sa tanang mga pagtulon-an. Busa, kinahanglanon nimo ang paggamit sa kumpletong Bibliya nga Cebuano sa pagtoon nimo niining maong kurso.

Masusing pagtoon sa mapa

Sa sinugdanan niining basahon, makita nimo ang MAPA nga may giya o kalambigitan sa DALAN SA KINABUHI.

Ang DALAN SA KINABUHI nagahingalan sa nag-unang dalan diin ang mga tawo nga nahimugso niining kalibutana nagapanaw. Sa pagpanaw sa matag-usa sa dalan sa kinabuhi, adunay pipila nga misubay sa dalan sa pagtoo ngadto sa kinabuhing walay katapusan. Ang uban misubay sa sayop nga dalan sa pagtoo, ang uban usab misubay sa dalan sa iyang kinabuhi diha sa pagkadilimatinoohon ug nagpabilin nga patay nga espirituhanon. Ang tanang mga tawo nanagkuyog sa paglakaw niining tawhanong kinabuhi, busa usa lamang ang dalan nga gihulagway. Ang mapa nagsugod sa pagsulod sa tawo dinhi sa kalibutan ug gitapus sa pagtak-op sa usa ka libo (1000) katuig nga paghari ni Cristo. Sa pagpadayon sa atong pagtoon, ikaw mahimong usa ka magpapanaw, sugod sa tanaman sa Eden ug nagapadayon sa pagpanaw ngadto sa walay katapusang gingharian.

Tun-i pag-ayo ang mga bersikulo sa Bibliya

Daghang mga bersikulo nga gihatag aron sa pagpakita kanimo nga ang tanang gipahayag gibasi sa Pulong sa Dios. Ablihi ang imong Bibliya sa magatoon ka sa mga pagtulon-an. Tan-awa ang tanang mga bersikulo ug basaha pag-ayo. Sa pagtan-aw sa bersikulo sa Bibliya, pananglitan Juan 3:16, nagpasabut sa libro ni Juan, kapitulo tres (3) bersikulo desisayis (16).

Usa ka sag-ulohan nga bersikulo ang gihatag sa kada pagtulon-an. Sag-uloha ang mahinungdanong mga pulong sa maong bersikulo tungod kay makatabang kini kanimo sa pagkahibalo sa Pulong sa Dios ug pagpahayag niini ngadto sa uban.

Unsaon pagtoon?

Ang DALAN SA KINABUHI adunay baynte-singko (25) ka mga pagtulon-an. Ang matag pagtulon-an adunay bulohaton nga imong tubagon human sa imong pagtoon. Ipadala kanamo ang imong bulohaton kon gusto ka. Among susihon ang imong mga tubag, kini mogasto ug taastaas nga panahon, apan padayon lang sa sunod nga pagtulon-an.

Sa dili ka pa magtuon, pag-ampo una sa Dios nga hayagan ang imong kasingkasing ug hunahuna nga masabtan nimo ang mga kamatuoran nga imong pagatun-an.

Suginli ang imong pamilya ug mga higala mahitungod niining maong kurso.